

萬雅文庫

第一集 千種

王雲五主編

白香山集

(九)

白居易著

商務印書館發行



白香山集

(九)

白居易著

國學基本叢書

萬有文庫

第一集一千種

總編纂者

王雲五

商務印書館發行

白香山集

卷五十七

律詩 五言 七言 凡九十首

戊申歲暮詠懷三首

窮冬月末兩三日，半百年過六七時。龍尾趁朝無氣力，牛頭參道有心期。榮華外物終須悟，老病傍人豈得知。猶被妻兒教進退，莫求致仕且分司。
唯生一女才十二，秬欠三年未六旬。婚嫁累輕何怕老，飢寒心慣不憂貧。紫泥丹筆皆經手，赤紱金章盡到身。更擬踟躕覓何事，不歸嵩洛作閑人。
七年囚閉作籠禽，但願開籠便入林。幸得展張今日翅，不能辜負昔時心。人間禍福愚難料，世上風波老不禁。萬一差池似前事，又應追悔不抽簪。

贈夢得

心中萬事不思量，坐倚屏風臥向陽。漸覺詠詩猶老醜，豈宜憑酒更猖狂。頭垂白髮我思退，脚踢青雲君欲忙。秬有今春相伴在，花前臚醉兩三場。

想東遊五十韻 并序

大和三年春，予病免官後，憶遊浙右數郡，兼思到越一訪微之，故兩浙之間，一物已上，想皆在目。吟且成

篇不能自休。盈五百字。亦猶孫興公想天台山而賦之也。

海內時無事。江南歲有秋。生民皆樂業。地主盡賢侯。郊靜銷戎馬。城高逼斗牛。平河七百里。沃壤二三州。坐有湖山趣。行無風浪憂。食寧妨解纜。寢不廢乘流。泉石諳天竺。烟霞識虎丘。餘芳認蘭澤。遺詠思蘋洲。菡萏紅塗粉。菰蒲綠潑油。鱗差漁戶舍。綺錯稻田溝。紫洞藏仙窟。玄泉貯怪湫。精神昂老鶴。姿彩媚潛蚪。靜聞天上妙。閑窺物狀幽。投竿出比目。擲果下瀟猴。味苦蓮心小。漿甜蔗節稠。橘苞從自結。藕孔是誰鉤。逐日移潮信。隨風變棹謳。遞夫交烈火。候吏次鳴騶。梵塔形疑踊。閭門勢欲浮。客迎攜酒榼。僧待置茶甌。小宴閑談笑。初筵雅獻酬。稍催朱蠟炬。徐動碧牙籌。圓蓋飛蓮子。長裾曳石榴。柘枝隨畫鼓。調笑從香毬。幕颺雲飄檻。簾褰月露鉤。舞繁紅袖凝。歌切翠眉愁。絃管寧容歇。盃盤未許收。良辰宜酩酊。卒歲好優游。繪綵鮮仍細。葦絲滑且柔。飽殮爲日計。穩睡是身謀。名愧空虛得。官知止足休。白嫌猶屑屑。衆笑大悠悠。物表疎形役。人寰足悔尤。蛾須遠燈燭。兔勿近罝罟。幻世春來夢。浮生水上漚。百憂中莫入。一醉外何求。未死癡王湛。無兒老鄧攸。蜀琴安膝上。周易在牀頭。去去無程客。行行不繫舟。勞君頻問訊。勸我少淹留。雲雨多分散。關山苦阻修。一吟江月別。七見日星周。珠玉傳新什。鸞鸞念故儔。懸旌心宛轉。束楚意綢繆。驛舫粧青雀。官槽餼紫駟。鏡湖期遠汎。禹穴約冥搜。舉掃題詩壁。先開望海樓。飲思親履舄。宿憶並衾綢。志氣吾衰也。風情子在。不應須相見後。別作一家遊。

病免後喜除賓客

臥在漳濱滿十旬。起爲商皓伴三人。從今且莫嫌身病。不病何由索得身。

長樂亭留別

灞橋風烟函谷路。曾經幾度別長安。昔時蹙促爲遷客。今日從容自去官。優詔幸分四皓秩。祖筵慚繼二疎歡。塵纓世網重重縛。迴顧方知出得難。

陝府王大夫相迎偶贈

紫微閣老自多情。白首園公豈要迎。伴我綠槐陰下歇。向君紅旆影前行。綸巾髮少渾欹仄。監輿肩齊甚穩平。但問主人留幾日。分司賓客去無程。

別陝州王司馬

笙歌惆悵欲爲別。風景闌珊初過春。爭得遣君詩不苦。黃河岸上白頭人。

將至東都先寄令狐留守

黃鳥無聲葉滿枝。閑吟想到洛城時。惜逢金谷三春盡。恨拜銅樓一月遲。詩境忽來還自得。醉鄉潛去與誰期。東都添箇狂賓客。先報壺觴風月知。

答崔十八見寄

明朝欲見羣樽伴。洗拭金盃拂玉徽。君乞曹州刺史替。我拋刑部侍郎歸。倚槽老馬收蹄立。避箭高鴻盡翅飛。豈料洛陽風月夜。故人垂老得相依。

贈皇甫賓客

輕衣穩馬槐陰路。漸近東來漸少塵。耳闌久憎聞俗事。眼明初喜見閑人。昔曾對作承華相。今復連爲博

望賓始信淡交宜久遠。與君轉老轉相親。

歸履道宅

驛吏引藤輿。家僮開竹扉。往時多暫住。今日是長歸。眼下有衣食。耳邊無是非。不論貧與富。飲水亦應肥。

問江南物

歸來未及問生涯。先問江南物在耶。引手摩挲青石筍。迴頭點檢白蓮花。蘇州舫故龍頭暗。王尹橋傾鴈齒斜。別有夜深惆悵事。月明雙鶴在裴家。

蕭庶子相過

半日停車馬。何人在白家。慇懃蕭庶子。愛酒不嫌茶。

答尉遲少尹問所須

乍到頻勞問所須。所須非玉亦非珠。愛君水閣宜閑詠。每有詩成許去無。

詠閑

但有閑銷日。都無事繫懷。朝眠因客起。午飯伴僧齋。樹合陰交戶。池分水夾階。就中今夜好。風月似江淮。

同崔十八寄元浙東王陝州

未能同隱雲林下。且復相招祿仕間。隨月有錢勝賣藥。終年無事抵歸山。鏡湖水遠何由汎。棠樹枝高不易攀。惆悵八科殘四在。兩人榮闇兩人閑。

答蘇庶子月夜聞家僮奏樂見贈

牆西明月水東亭。一曲霓裳按小伶。不敢邀君無別境。絃生管澁未堪聽。

偶吟

里巷多通水。林園盡不扃。松身爲外戶。池面是中庭。元氏詩三帙。陳家酒一瓶。醉來狂發詠。鄰女映籬聽。

白蓮池汎舟

白藕新花照水開。紅窗小舫信風迴。誰教一片江南興。逐我慇懃萬里來。

酬令狐留守尙書見贈十韻

長慶清風在。夔龍變理餘。大和膏雨降。周邵保釐初。嵩少當宮署。伊瀛入禁渠。曉關開玉兔。夕鑰納銀魚。舊眷憐移疾。新吟念索居。離聲雙白鶴。行色一籃輿。罷免無餘俸。休閒有弊廬。傭於樵叔夜。渴似馬相如。酒每蒙酤我。詩常許起予。洛中歸計定。一半爲尙書。

池上卽事

行尋甃石引新泉。坐看修橋補釣船。綠竹挂衣涼處歇。清風展簟困時眠。身閑當貴真天爵。官散無憂卽地仙。林下水邊無厭日。便堪終老豈論年。

酬裴相公見寄二絕

習靜心方泰。勞生事漸稀。可憐安穩地。捨此欲何歸。

又一首

一雙垂翅鶴。數首解嘲文。慙是迂閑物。爭堪伴相君。

答夢得聞蟬見寄

開緘思浩然。獨詠晚風前。人貌非前日。蟬聲似去年。槐花新雨地。柳影欲秋天。聽罷無他計。相思又一篇。

得夢得新詩

池上今宵風月涼。閑教小樂理霓裳。集仙殿裏新詞到。便播笙歌作樂章。

令狐尚書許過弊居先贈長句

不矜軒冕愛林泉。許到池頭一醉眠。已遣平治行藥逕。兼教掃拂釣魚船。應將筆硯隨詩主。定有笙歌伴酒仙。祇候高情無別物。蒼苔石筍白花蓮。

自題

老宜官冷靜。貧賴俸優饒。熱月無堆案。寒天不趁朝。傍看應寂寞。自覺甚逍遙。徒對盈樽酒。兼無愁可銷。

答崔十八

勞將白叟比黃公。今古由來事不同。我有商山君未見。清泉白石在胸中。

偶詠

禦熱蕉衣健。扶羸竹杖輕。誦經憑檻立。散藥遶廊行。暝槿無風落。秋蟲欲雨鳴。身閑當將息。病亦有心情。

答蘇六

但喜暑隨三伏去。不知秋送二毛來。更無別計相寬慰。故遣陽關勸一盃。

秋遊

下馬閑行伊水頭。涼風清景勝春遊。何事古今詩句裏。不多說著洛陽秋。

偶作

張翰一盃酒。榮期三樂歌。聰明傷混沌。煩惱汚頭陀。簞冷秋生早。堦閑日上多。近來門更靜。無雀可張羅。

同崔十八宿龍門兼寄令狐尚書馮常侍

水碧玉磷磷。龍門秋勝春。山中一夜月。海內兩閑人。共是幽棲伴。俱非富貴身。尚書與常侍。不可得相親。

遊平泉贈晦叔

照水容雖老。登山力未衰。欲眠先命酒。暫歇亦吟詩。何喜身無縛。終慚鬢有絲。迴頭語閑伴。閑校十年遲。

不出門

不出門來又數旬。將何銷日與誰親。鶴籠開處見君子。書卷展時逢古人。自靜其心延壽命。無求於物長精神。能行便是真修道。何必降魔調伏身。

勸病鶴

右翅低垂左脛傷。可憐風貌甚昂藏。亦知白日青天好。未要高飛且養瘡。

臨都驛送崔十八

勿言臨都五六里。扶病出城相送來。莫道長安一步地。馬頭西去幾時迴。與君後會知何處。爲我今朝盡一盃。

送滕庶子致仕歸婺州

春風秋月。懽歌酒。八十年來。翫物華。已見曾孫。騎竹馬。猶聽侍女。唱梅花。入鄉不杖歸時健。出郭乘輅到處誇。兒着繡衣。身衣錦。東陽門戶數滕家。

雨中訪崔十八

肩舁仍挈榼。莫怪就君來。秋雨經三宿。無人勸一盃。

拜表早出贈皇甫賓客

一月一迴同拜表。莫辭侵早過中橋。老於君者應無數。猶趁西京十五朝。

對鏡

三分鬢髮二分絲。曉鏡秋容相對時。去作忙官應太老。退爲閑叟未全遲。靜中得味何須道。穩處安身更莫疑。若使至今黃綺在。聞吾此語亦分司。

勸酒十四首 并序

予分秩東都。居多暇日。閑來輒飲。醉後輒吟。若無詞章。不成謠詠。每發一意。則成一篇。凡十四篇。皆主於酒。聊以自勸。故以何處難忘酒。不如來飲酒。命篇。

何處難忘酒七首

何處難忘酒。長安喜氣新。初登高第客。乍作好官人。省壁明張榜。朝衣穩稱身。此時無一盞。爭奈帝城春。何處難忘酒。天涯話舊情。青雲俱未達。白髮遞相驚。二十年前別。三千里外行。此時無一盞。何以敘平生。何處難忘酒。朱門美少年。春分花發後。寒食月明前。小院迴羅綺。深房理管絃。此時無一盞。爭過豔陽天。

何處難忘酒。霜庭老病翁。暗聲啼蟋蟀。乾葉落梧桐。鬢爲愁先白。顏因醉暫紅。此時無一盞。何計奈秋風。
何處難忘酒。軍功第一高。還鄉隨露布。半路授旌旄。玉柱剝葱手。金章爛縹袍。此時無一盞。何以騁雄豪。
何處難忘酒。青門送別多。斂襟收涕淚。簇馬聽笙歌。烟樹灞陵岸。風塵長樂坡。此時無一盞。爭奈去留何。
何處難忘酒。逐臣歸故園。敕書逢驛騎。賀客出都門。半面瘴烟色。滿衫鄉淚痕。此時無一盞。何物可招魂。
不如來飲酒七首

莫隱深山去。君應到自嫌。齒傷朝水冷。貌苦夜霜嚴。漁去風生浦。樵歸雪滿巖。不如來飲酒。相對醉厭厭。
莫作農夫去。君應見自愁。迎春犁瘦地。趁晚餽羸牛。數被官加稅。稀逢歲有秋。不如來飲酒。相伴醉悠悠。
莫作商人去。恓惶君未諳。雪霜行塞北。風水宿江南。藏鏹百千萬。沉舟十二三。不如來飲酒。仰面醉酣酣。
莫事長征去。辛勤難具論。何曾畫麟閣。祇是老轅門。蟣虱衣中物。刀槍面上痕。不如來飲酒。合眼醉昏昏。
莫學長生去。仙方誤殺君。那將薤上露。擬待鶴邊雲。矻矻皆燒藥。纍纍盡作墳。不如來飲酒。閑坐醉醺醺。
莫上青雲去。青雲足愛憎。自賢誇智慧。相軋鬪功能。魚爛緣吞餌。蛾焦爲撲燈。不如來飲酒。任性醉騰騰。
莫入紅塵去。令人心力勞。相爭兩蝸角。所得一牛毛。且滅噴中火。休磨笑裏刀。不如來飲酒。穩臥醉陶陶。
和令狐相公寄劉郎中兼見示長句

卽事

日月天衢仰面看。尚淹池鳳滯臺鸞。碧幢千里空移鎮。赤筆三年未轉官。別後縱吟終少興。病來雖飲不多歡。酒軍詩敵如相遇。臨老猶能一據鞍。

見月連宵坐。聞風盡日眠。室香羅藥氣。籠煖焙茶烟。鶴啄新晴地。雞棲薄暮天。自看淘酒米。倚杖小池前。
期宿客不至

風飄雨灑簾帷故。竹映松遮燈火深。宿客不來嫌冷落。一樽酒對一張琴。

問移竹

問君移竹意如何。慎勿排行但間窠。多種少栽皆有意。大都少校不如多。

重陽石上賦白菊

滿園花菊鬱金黃。中有孤叢色似霜。還似今朝歌酒席。白頭翁入少年場。

偶吟二首

眼下有衣兼有食。心中無喜亦無憂。正如身後有何事。應向人間無所求。靜念道經深閉目。閑迎禪客小
低頭。猶殘少許雲泉興。一歲龍門數度遊。

晴教曬藥泥茶竈。閑看科松洗竹林。活計縱貧長淨潔。池亭雖小頗幽深。廚香炊黍調和酒。牕暖安絃拂
拭琴。老去生涯祗如此。更無餘事可勞心。

夜題玉泉寺

遇客多言愛山水。逢僧盡道厭羈塵。玉泉潭畔松間宿。要且經年無一人。

何處春先到

何處春先到。橋東水北亭。凍花開未得。冷酒酌難醒。就日移輕榻。遮風展小屏。不勞人勸醉。鶯語漸丁寧。

勉閑遊

天時人事常多故。一歲春能幾度遊。不是塵埃便風雨。若非疾病卽悲憂。貧窮心苦多無興。富貴身忙不自由。唯有分司官恰好。閑遊雖老未能休。

寄兩銀榼與裴侍郎因題兩絕

貧無好物堪爲信。雙榼雖輕意不輕。願奉謝公池上酌。丹心綠酒一時傾。慣和麴蘖堪盛否。重用鹽梅試洗看。小器不知容幾許。襄陽米賤酒升寬。

小橋柳

細水涓涓似淚流。日西惆悵小橋頭。衰楊葉盡空枝在。猶被霜風吹不休。

哭微之二首

八月涼風吹白幕。寢門廊下哭微之。妻孥朋友來相弔。唯道皇天無所知。文章卓犖生無敵。風骨英靈歿有神。哭送咸陽北原上。可能隨例作灰塵。

馬上晚吟

人少街荒已寂寥。風多塵起重蕭條。上陽落葉飄宮樹。中渡流澌擁渭橋。出早冒寒衣校薄。歸遲侵黑酒全消。如今不是閑行日。日短天陰坊曲遙。

初見劉二十八郎中有感

欲話毗陵君反袂。欲言夏口我沾衣。誰知臨老相逢日。悲歎聲多言笑稀。

送劉郎中赴任蘇州

仁風膏雨去隨輪。勝境歡遊到逐身。水驛路穿兒店月。花船棹入女湖春。宣城獨詠窗中岫。柳惲單題汀上蘋。何似姑蘇詩太守。吟詩相繼有三人。

福先寺雪中餞劉蘇州

送君何處展離筵。大梵王宮大雪天。庾嶺梅花落歌管。謝家柳絮撲金田。亂從紈袖交加舞。醉入籃輿取次眠。却笑召鄒兼訪戴。只持空酒駕空船。

醉中重留夢得

劉郎劉郎莫先起。蘇臺蘇臺隔雲水。酒盞來從一百分。馬頭去便三千里。

雪夜喜李郎中見訪兼酬所贈

可憐今夜鵝毛雪。引得高情鶴鵞人。紅蠟燭前明似晝。青氈帳裏暖如春。十分滿盞黃金液。一尺中庭白玉塵。對此欲留君便宿。詩情酒分合相親。

任老

不愁陌上春光盡。亦任庭前日影斜。面黑眼昏頭雪白。老應無可更增加。

勸歡

火急歡娛慎勿遲。眼看老病悔難追。樽前花下歌筵裏。曾有求來不得時。

答王尚書問履道池舊橋

虹梁鴈齒隨年換。素板朱欄逐日修。但恨尙書能久別。莫愁川守不頻遊。重移舊柱開中眼。亂種新花擁兩頭。李郭小船何足問。待君乘過濟川舟。

晚歸府

晚從履道來歸府。街路雖長尹不嫌。馬上涼於牀上坐。綠槐風透紫蕉衫。

從龍潭寺至少林寺題贈同遊者

山屨田衣六七賢。寒芳蹋翠弄潺湲。九龍潭月落杯酒。三品松風飄管絃。強健且宜遊勝地。清涼不覺過炎天。始知鶴駕乘雲外。別有逍遙地上仙。

夜從法王寺下歸嶽寺

雙刹夾虛空。綠雲一徑通。似從忉利下。如過劍門中。燈火光初合。笙歌曲未終。可憐師子座。昇出淨名翁。

宿龍潭寺

夜上九潭誰是伴。雲隨飛蓋月隨盃。明年尙作三川守。此地兼將歌舞來。

嵩陽觀夜奏霓裳

開元遺曲自淒涼。况近秋天調是商。愛者誰人唯白尹。奏時何處在嵩陽。迴臨山月聲彌怨。散入松風韻更長。子晉少姨聞定怪。人間亦便有霓裳。

過元家履信宅

雞犬喪家分散後。林園失主寂寥時。落花不語空辭樹。流水無情自入池。風蕩醺船初破漏。雨淋歌閣欲

傾欵前庭後院傷心事。唯是春風秋月知。

和杜錄事題紅葉

寒山十月旦。霜葉一時新。似燒非因火。如花不待春。連行排絳帳。亂落翳紅巾。解駐籃輿看。風前唯兩人。

題崔常侍濟上別墅

求榮爭寵任紛紛。脫棄金貂祗有君。散員疏去未爲貴。小邑陶休何足云。山色好當晴後見。泉聲宜向醉中聞。主人憶爾爾知否。拋却青雲歸白雲。

過溫尚書舊莊

白石青泉拋濟口。碧幢紅旆照河陽。村人都不知時事。猶自呼爲處士莊。

天壇峯下贈杜錄事

年顏氣力漸衰殘。王屋中峯欲上難。頂上將探小有洞。喉中須嚙大還丹。河車九轉宜精鍊。火候三年在好看。他日藥成分一粒。與君先去掃天壇。

贈僧五首

鉢塔院如大師

百千萬劫菩提種。八十三年功德林。若不秉持僧行苦。將何報答佛恩深。慈悲不瞬諸天眼。清淨無塵幾地心。每歲八關蒙九授。慇懃一戒重千金。

神照上人